

Suliassaqarfik Aningaasarsiornikkut iluarsiissuteqartarnek nakkutilliinerlu, Namminersornermut inatsit naapertorlugu liste II imm. 25, Kalaallit Nunaanni oqartussaavigineqalernissaanut Naalagaaffeqatigiinni oqartussanut isumaqatigiinniarnert aallartinneqarnissaat siunertaralugu saaffiginninnissaanut Naalakkersuisut peqquneqarnissaat Inatsisartunut aalajangiiffissatut siunnersuut.
(Inatsisartunut ilaasortaq Pele Broberg, Naleraq)

Akissuteqaat

Siullermeerinnineq

Aallaqqaasiullugu Naalakkersuisut sinnerlugit Inatsisartunut ilaasortaq Pele Broberg, Naleraq, aalajangiiffigisassatut siunnersuuteqarneranut qutsavigissavara.

Aningaasalersuisarnermik malittarisassiuussineq nakkutilliinerlu immikkoortunut soorlu aningaaserivinnut, sillimmasiinernut, pappiaqqanik nalilinnik niueruteqarnernut peqatigiiffinnullu aningaasaliinermik ingerlatsisunut tunggavoq.

”Suliassaqarfinnik tigusinissaq pillugu nassuiaat” 2018-imeersumi aningaasalersuisarnermi inatsisinik ingerlatsinermi aningaasartuutissat allassimasut aalajangiiffigisassatut siunnersuummi innersuussutigineqarput. Nassuiaammi pineqartumi tassani danskit naalagaaffianut Kalaallit Nunaat sinnerlugu suliassaqarfiup ingerlanneqarnera qanoq akeqarnersoq, kisitsisit 2015-imeersut atorlugit takutinneqarpoq. Kisiannili suliassaqarfiup isumannaatsumik ingerlanneqarnera Namminersorlutik Oqartussanut imaluunniit nunatsinni aningaasaqarnermut sullissivinnut qanoq akeqarnissaa naatsorsuutigineqarsinnaanersoq, sutigulluunniit nassuiaammi isummerfigineqanngilaq. Tassunga tunggasup eqqumaffigineqarnissaa annertuumik pingaaruteqarpoq.

Oqartussaaffimmik tigusineq nakkutilliinerlut aqqissuussamik nutaamik Finanstilsynip akisussaaffiata assinganik akisussaaffeqartumik pilersitsinermik pisariaqartitsiviussaaq. Peqatigisaanik immikkoortup qallunaat naalagaaffianniingitsoq ingerlannera Kalaallit Nunaannut akisunerujussuusinnaasoq, Savalimmiuni misilittakkat takutippaat. Tamatuma sanitigut qularnaarisunik aningaasaateqarfinnut aningaasaliinissaq pisariaqarpoq, taamaattoqanngippammi nunatsinnit aningaasanik aniasoqalerneranik tamanna malitseqarsinnaavoq.

Immikkoortup tigusinerani Kalaallit Nunaat EU-mit “Nunatut allatut” isigineqalissaaq, taamaaliornerlu akuersissuteqartarnermi aningaasalersuisarnermillu ingerlatsisuni IT-mik nalimmassaanernut annertuumik aningaasartuuteqarnermik kinguneqarsinnaavoq. Tamatuma saniatigut Kalaallit Nunaata nunarsuarmi aningaasalersuisarnermi periutsit nalinginnaasut, nunarsuarmi ingerlatsisunit angisuunit aalajangersarneqartut suli malittussaassavai, taakkunungalu sunniuteqarsinnaanernut killilimmik periarfissaqassalluni.

Tamatuma saniatigut soraarnerussutisianik ingerlatseqatigiiffinit piffimmi aningaasaliinermut sinaakkutit pitsanngorsarneri, inatsilerineq tamakkiisoq tigunngikkaluarlugu, naalagaaffimmik oqaloqateqarnikkut iliuuseqarfigineqarsinnaavoq. Soraarnerussutisianik ingerlatseqatigiiffiit maani nunatsinni aningaasaliinerunissaat Naalakkersuisut soorunami kissaatigaat, peqatigisaanilli tunngaviatigut aningaasat soraarnerussutisiaqalernissamut katersat annertuumik nalorninartortalinnut aningaasaliinissamut naleqquttuunnginnerat Naalakkersuisut tikkuarumavaat. Soraarnerussutisiaqalernissamik ingerlatseqatigiiffiit aningaasanik inissiinissaannut piunasaqaatit sullitat aningasanik ileqqaakkaminnik annaasaqarnissaasa, taamaalillutillu soraarninngornerminni aningaasaataarussimanissaasa pinngitsoortinnissaa siunertarlugu ilusiligaapput. Immikkoortumik tiguserup pissutsit tamakku allanngortissanngilai.

Takuneqarsinnaasutut suliassaqrarfiup matuma tigunissaanik aalajangiinissaq sioqqullugu, pissutsit amerlasuut isumaliutigineqaqqaartariaqarput.

Naalakkersuisut suliassaqrarfinnik tigorianaanerpaanik tiguserinnaanermut sukumiisumik pilersaarusiornissaat, Inatsisartut UPA2022-mi akueraat. Aningaasalersuisarnermik inatsisiliornermik tiguserinissap aalajangiiffiginissaa sioqqullugu, suliap tamatuma naammassineqassasoq Naalakkersuisut isumaqarput. Siunnersuuteqartup siunertaa suliat taassuma ilaatut naapertuunnerpaamik ingerlanneqarsinnaasoq, Naalakkersuisut ilanngullugu isumaqarput.

Tamatuma saniatigut Namminersorneq pillugu inatsimmi § 21 naapertorlugu isumalioqatigiissitamik pilersitsinissaq pillugu nassuiaat ataatsimiinnermi uani agguanneqartoq, Naalakkersuisut ilanngullugu innersuussutigaa. Aalajangiiffigisassatut siunnersuummi uani anguniakkap piviusunngortinnera aamma nassuiaammik tassannga kaammattuutigisaanillu malitseqartitsinermi pissusissamisoortumik ilaassaaq.

Tamanna tunuliaqutaralugu Naalakkersuisut **allannguutissatut siunnersuut** tulliuuttoq saqqummiuppaat:

”UPA2023/142-p aamma 143-p sularineqarnerani Inatsisartut aalajangigaanni aningaasalersuisarnermik inatsisiliornermik nakkutilliinermillu tiguserinnaanerup ilanngunneqarnissaanik Naalakkersuisut peqquneqarnissaat pillugu Inatsisartunut aalajangiiffigisassatut siunnersuut”.

Taama oqaaseqarlutik Inatsisartuni oqallinnissaq Naalakkersuisut qilanaaraat.